

# Dithero tsa Tirelano mo Kutlwanong

03/2015 Thero ka Sontaga wa 03 mo sebakeng sa Adfente, e le ka 14. 12. 2014

## **Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno le kwadilwe mo go Jes. 40:3.10 le re: **"Baakanyang tsela ya MORENA mo nageng, ... MORENA o e tla, a le thata."**

1. Sefela sa 47 - 45/47
2. **Thapelo:** Morena Jesu Keresete, re letetse wena. Re lebogela tsosetso ya Lefoko la gago le le re lemosang ka go tla ga gago. Ke gona re kopang, re re: Tiisa tumelo le tsamao ya rona ka go tla ga gago. Amen.
3. Lefoko la Testamente e kgologolo le kwadilwe mo go Jesaya 40:1-11:  
Epistolo ka fa thulaganyong ya 2 e kwadilwe mo go 1 Bakorinthe 4:1-5;  
Efangele ka fa thulaganyong ya 3 e kwadilwe mo go Luka 3:1-14.
4. A go ipolelwe tumelo ya bokeresete!
5. Sefela sa 48 - 46/48
6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 11:2-10, e re: "E rile Johane a le mo ntlong ya kgolegelo, mme a utlwela ditiro tsa ga Keresete, a roma barutwa ba gagwe ba le babedi, a mmotsa a re: 'A ke wena yo o tlang, a kampo re lebelele o sele?' Jesu a ba araba a re: 'Tsamayang lo bolelele Johane tse lo di utlwang le tse lo di bonang: Difofu di a bona, batlhotsi ba a tsamaya, balepero ba a phepafadiwa, disusu di a utlwa, baswi ba tsosiwa, bahumanegi ba rerelwa Efangele. Mme go sego yo o sa kgopisiweng ke nna.' Ya re bone ba tsamaya, Jesu a simolola go bua le batho ka ga Johane a re: 'Lo ne lo tswela kwa sekakeng go bona eng? A e ne e le lotlhaka lo lo tshikinngwang ke phefo? Gape, lo ne lo tswela go bona eng? A e ne e le motho yo o apereng tse di boleta? Kana ba ba apereng tse di boleta ba mo matlong a dikgosi. Gape, lo ne lo tswela eng? A e ne e le go bona moporofeti? Ee, ke lo raya ke re: Yo e bile o mogolo go moporofeti. Gonne ke ene go kwadilweng ka ga gagwe ga twe: 'Bona, ke roma morongwa wa me fa pele ga gago, yo o tla go baakanyetsang tsela.'" Amen.

**8. Thero:** Barategi mo Moreneng wa rona Jesu Keresete! Potso eo ya ga Johane, ga ke belaele ka yona, fa re ka tlhagelwa ke yona jaaka ba bangwe. Rotlhe re tshwenyegile ka tse Jesu a iseng a re golole mo go tsona, ke raya tse a iseng a di re tlhalosetseng. Re re: Fa re utlwa gore ke Mopholosi, re eletsa thata gore a tota o tla re golola mo boketeng. Ke ka ntlha ya eng, fa e le Mopholosi. Go gopodiwa ka ba le bantsi gore Johane le ene o ne a na le matshwenyego ao mo botlhokong jwa kgolegelo a ntse a le mo kotsing ya go bolawa. Rona re na le matshwenyego a

rona, re re: A farologana le ale, mme le ona a bokete mo go rona. Le rona re ntse mo lefifing la loso, e le lwa rona, gongwe lwa ba losika lwa rona.

Matlhoko le poifo di a re felegetsa, re tshwenngwa ke bodutu. Re itshwenyegela ka ntlha ya tsa tšhelete, le ka tsa losika. Go na le boleo le nyatsego ka metlha. Go latlhegelwa ke meriti go diragala gantsi, le go sebiwa ka maaka. Bokoa jo re tshwerweng ka jona re a bo itse. Re lwa ka metlha, le go tsena mo diphosong. Matshwenyego ao, re solofeditswe ke Keresete gore re tla gololwa le mo go ona.

Le rona re ka ya mo Moreneng mmogo le matshwenyego ao le bokete jaaka Johane. Le rona, Jesu ke wa rona, fela jaaka e le wa ga Johane. Johane o ne a itse sentle tsa baporofeti le Dipesalome, tse go kwadilweng mo go tsona ka ga Mogolodi yo o solofeditsweng, fa a tla tla, e le Jesu yo o alafileng balwetsi, disusu le digole, le go tsosa baswi. Johane o ne a utlwa tsa Morena, a letetse Keresete yo o solofeditsweng gore o tla dirafatsa tsotlhe tse di kwadilweng ke baporofeti le Dipesalome. Jesu o ne a letelwa ke Johane, fa e se yo o tlang a tla go itumisa fela ka dithaelo tse di neng di sa bolelelwe pele.

Le rona re letetse Morena yo o tla dirafatsang tse di boleletsweng pele, e le Morena yo o gomotsang ba hutsafadi, a bofa, a alafa dintho tsa bona ba ba utlwisitsweng ka maleo le melato botlhoko, yo o tla apesang, le go femela ba ba ka fa tlase ga khutso ya boleo, e bong Jesu. Ke ene yo o tlhokomelang go baya mo godimo ga rona ka metlha tshegofatso le molemo o montsi. Re mo letetse gore a re golole mo diketaneng tsa boleo le Satane gore a sedimosetse sefatlhego sa gagwe mo godimo ga rona.

Go gontle go lebelela tseo, jaaka mo go Johane go ne go le molemo go lebelela tseo. Ka go dira jalo re letela Morena wa rona go re a re direle tsotlhe tse di molemo le masego a gagwe gore a tsoseletse dinonofo tsa rona, a tiise mangwele a rona a a boreperepe, re mo letetse gore a busetse kwa morago bosula jotlhe jwa ga Satane, a re sedimosetse, a phimole boleo le melato ya rona, poifo , le matlhoka tshego otlhe. Johane o ne a tsena mo matshwenyegong ao ka go letela Morena, a na le tsholofelo mo go ene. E ne e le bodutu jwa tšhaka. Morena a ka bo a mo ntsha mo go tseo ka fa a eleditseng ka teng. Kgang e reng? E ne e le tse Jesu ka nosi a ineetseng go dira thato ya ga Rraagwe mo tirong ya gagwe, e se ya gagwe fela. Thato eo e reng? E le go pholosa baleofi, le go phimola boleo, go phutha batho ba gagwe ba merafe yotlhe ba tsena mo go pholosiweng ka leina la gagwe. Fa nako eo e le teng, Jesu o tla dira tseo, o tla ka fa thatong ya ga Rraagwe, a rerela batho Efangele, a dirafatsa maikaelelo a yona ka go ba swela a bapolelwa mo sefapaanong. Fa nako ya gagwe e tlile o tla re tsaya rotlhe mmogo le bone, a re tsenye ka boitumelo jo bogolo mo pusong e e sa feleng ya ga Rraagwe. A go lebogwe leina la ga Jesu, Mopholosi wa rona!

Le fa go ntse jalo, jaanong re sa ntse re tlaletswe, jaaka Johane mo kgolegelong. Mo ditlalelong tsa rona Jesu o tshwenyegile fela jalo mmogo le rona. Ba bantsi ba tlhakana tlhogo mo nakong eo, fa Jesu a tlaletswe mmogo le rona. Jesu ke Mopholosi ka fa thatong ya Modimo, e seng ka fa ya batho. Ya batho e re: O pholositse ba bangwe, a a ipholose fela jalo! Ba lefatshe ba batla mopholosi yo o silofalang mmogo le bone, yo o utlwanang le tsa bona, yo o ba rayang a re: Lo siame lona, ga lo a leswafala mo go kalo. Ditiro tsa rona, thato, le keletso ya lona di molemo, ke tsa botlalo. Baleofi ba rata go kgetha mopholosi yo o ntseng jalo ka bobona, le go itsietsa ka go ikgogomosa, fa e le ba ba siameng go feta ba bangwe. Ka fa tlhagong ya rona ya ga Atame re ntse jalo le rona, re batla go nna jaaka Modimo, re rata go bokiwa, le go tumisiwa, e seng go tlhapisiwa, le go baakanngwa.

Ke sona fela, fa re ineela go nyatsana, go balabala, re bona diphoso tsa yo mongwe, le yo mongwe. Re ipatlala tumo ya rona. Re boifa jaaka noga go nyadiwa, jaaka Johane a ne a nyadiwa, yo o neng a le mo kgolegelong. Re tabogela kwa re ka fitlhelang go tlotliwa teng. Re tlola taolo ya ga Jesu, e e reng: "Fa mongwe a go faphola lesameng le le jang, mo neele le la molema!" Nyaya, rona re re: "Tlotlo e ka nna jang mo go tseo?" Re e tlogela fela.

Jesu a araba Johane, le mo go rona o re bolelela fela jalo, a re: "Go sego yo o sa kgopisiweng ke nna." Go sego yo o sa nkeng a kgopisiwa, a ntse a khutlwa mo tseleng ya Morena go dira tsotlhe ka fa thatong ya gagwe. Morwa Modimo ga a ka a itirela sepe ka boene, mme o dirile tsotlhe ka fa thatong ya ga Rraagwe. A batla gore tlotlo e nne ya ga Rraagwe. Tseo di tla bonwa ka letsatsi la bofelo batho ba tsena mo legodimong. Banyatsi ba tshoswa ka dikgabo tsa molelo wa molete.

Ke gona lefoko la thero le reng? Le a tswelala, le botsa le re: "Lo ne lo tswela kwa sekakeng go bona eng?" Ke eng se se tlhagang mo tlhaloganyong ya rona, fa re akanya ka ga go bona Morena, gongwe matlole a madi a phuthogo? A kereke e penologa ka bontsi jwa bakaulengwe? Bakaulengwe ba bantle, a ga se gore lo ikapesitse ka botseno jwa tlhaloganyo? A botshelo bo se na matshwenyego? A bo na le boitumelo ka malatsi otlhe? Go se na ope mo toronkong? A re tlhomeleng! A re se ka ra eletsa go itumedisiwa fela ka tsa lefatshe. A re batleng tsa kwa godimo - tsa Modimo, e seng tsa batho!

Tse re di bonang ka Jesu ke tse: Ka ene puso ya legodimo e tlike mo lefatsheng, baleofi ba lalediwa go boela mo Modimong. Re senolelwa gore Jesu o fentse loso, le go re senolela ditsela tsa ga Rara yo o mo legodimong mo senkgweng le mo weineng mo selalelong sa gagwe, go tiisiwa, fa re le ba puso ya gagwe ka go ja mmele wa ga Keresete le ka go nwa madi a gagwe. Ke fa go phatsima letsatsi le lentle kwa Jesu a ntshang baleofi mo bosuleng teng, mo maleong le mo losong, le mo thateng ya ga Satane.

A re se ka ra kgopisega ka ntlha ya ditsela tse a dirang ka tsona, mme re letele Morena. Jesu o tla mo go rona go re busetsa mo tetlanong fa gare ga rona le Morena wa rona, yo e leng Modimo, e le Rara le Morwa le Mowa o o Boitshepo. Amen.

**9. Thapelo:** Seganka sa ga Dafita, Morena Jesu Keresete, re utlwile Lefoko la gago, re a le lebogela. Baakanya dipelo tsa rona gore re le boloke. Tsamaya le rona mo botshelong jotlhe jwa rona, re se go boife, mme re go ikanye, wena yo o busang ka bosakhutleng le Rara wa rona le Mowa o o Boitshepo. Amen. Thapelo ya Morena: Rara wa rona yo o mo legodimong

...

10. Sefela sa 64 - 65/63

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadiwe ke M. N. Mntambo, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.